



**Jus Canonicvm R.P. Pavli Laymanni, Soc: Jesu Theologi, Et
Olim In Alma Et Episcopali Academia Dilingana SS.
Canonum Ordinarii Professoris**

Juris Canonici A. R.P. Paulo Laymanno Societatis Jesu Theologo SS.
Canonum In Alma, Catholica, Et Episcopali Universitate Dilingana
Professore Qvondam Ordinario, Prælectionibus Academicis Illustrati

Laymann, Paul

Dilingæ, 1673

Capitvlvm LII. Venerabili.

[urn:nbn:de:hbz:466:1-62587](https://nbn-resolving.org/urn:nbn:de:hbz:466:1-62587)

Venerabili.

PARAPHRASIS.

Episcopus & Capitulum Ecclesie Corisoptonensis & vniuersi Abbates Ordinis Cisterciensis in generali capitulo congregati, ac multi alij Episcopi & Religiosi vnâ cum Abbate Conuentus S. Martini (aliâs S. Mauritii) eiusdem diocesis retulerunt Honorio III. quo modo piæ memoriæ Mauritius Abbas eiusdem Monasterii, claris ex diuino munere miraculis fulgeat, humillimè supplicantes, vt in Sanctorum catalogum referatur, vt quod populus nunc anticipando veluti vsurpat, cum eum sanctum appellat ac veneratur, id Sedis Apostolicæ interueniente auctoritate facere possit, idcirco Pontifex Episcopo cuidam & Abbati Mauritii diligentissimè inquirerent, & ad ipsum referrent. Ipsi post inquisitionem scriptum sigillis suis munitum ad Pontificem miserunt, in quo multa quidem & magna referebantur miracula, eaque per testes juratos ac nominatim expressos probata; at tamen non apparebat ex illo scripto, quòd testes singulatim examinati, & secundùm circumstantias, sicut fieri oportet, diligenter interrogati fuissent, ideò Pontifex consultius esse arbitrat, vt interea differatur negotium; atque idcirco scribit nunc ad Episcopos Corisoptonensem & Trecorensem mandans eis, vt testes, quos Abbas & Monachi S. Martini Cisterciensis Ordinis super vitâ & miraculis piæ memoriæ Mauritii Abbatis duxerint producendos, examinare singulatim curent, ea cum diligentia, quæ solet ac debet in receptione testium adhiberi.

SUMMARIVM.

1. Homines piè defunctos cultu publico absque licentia Papæ inuocare non licet, sed tantùm priuato.

2. Requisita ad Canonizationem sancti Confessoris, præuia inquisitio & cognitio Sanctitatis & miraculorum eius; Martyris autem de passione eius, & causa passionis.

3. Testes non simul, sed seorsim examinandi.

NOT. I. Homines piè in domino defunctos cultu publico inuocare ac venerari non licet absque summi Pontificis licentiâ, sed tantùm cultu priuato, quâ de re Innoc. & alij in c. 1. de reliq. SS. & dixi de hoc lib. 4. Th. Mor. Tract. 7. cap. 5. q. 7.

NOT. II. Ad canonizationem Sancti requiritur, vt priùs diligenter inquiretur & cognoscatur de sanctitate vitæ & miraculis, id verò ait Sylu. verb. Canonizatio intelligendum esse, si quispiam in sanctorum Confessorum numerum referendus sit, sin autem in numerum Martyrum, tunc inquirendum esse de passione eius & causâ passionis, num videlicet in fidei Christianæ testimonium mortem obierit, iuxta ea, quæ docui lib. 3. Th. Mor. Tract. 3. n. 2. & 3. nunc verò ista inquisitio & examen accuratum commissum est congregationi Cardinalium, quæ est circa ritus & ceremonias, vt patet ex Bulla Clementis VIII. de canoniz. B. Raymundi, quæ incipit Romana in summâ Bullarj.

NOT. III. Testes non simul, sed seorsim examinandi sunt, ita enim apparebit, vt vnum inter se de facto & circumstantiis facti consentiant, vt major ipsis fides habenda sit. ita sumitur ex cap. 13. Danielis. & tradit gl. recepta in c. Cum causam. 37. verb. Processus hoc tit. vbi ait, quòd depositiones testium non valent, nisi singulatim examinati sint, & sequitur Jo. Andr. hic n. 2. Abb. n. 1. & alij.

CAPITVLVM LIII.

Cum clamor.

PARAPHRASIS.

Archiepiscopus Acherontinus de Simoniâ & aliis criminibus grauiter infamatus erat,